

乾隆杭州府志

杭州府志卷八十二

人物 一 名臣三

國朝

黃機字大辰錢塘人順治丁亥進士由庶吉士歷禮戶吏  
三部尚書晉文華殿大學士端厚清謹公忠體國爲戶部  
稽核釐剔夙弊頓清兩任吏部勵廉節抑奔競疏通壅滯  
會

論大臣陳時務機以九門拏獲竊盜給賞太過恐邏者以邀賞滋  
波累又審案誣引良民反覆妄供貽累者衆當照初供定  
擬毋許任意更易姓名殃及無辜言甚剴切並得報可立

朝四十餘年廉潔自愛不名一錢告歸卒謚文僖

鄉賢留  
祀冊

姜圖南字滙思錢塘人順治己丑進士選庶吉士改御史  
茶馬關隴鹽漕淮海皆嶽嶽著名已轉外臺歷巡江右山  
左河南圖南性豪邁重然諾愛賓客所至車馬輻輳其爲  
御史也釐奸剔弊民獲更生巡關隴吳三桂爲平西王驕  
恣不法圖南廉得其狀露章奏之力言尾大不掉恐爲異  
日患三桂氣索大將以下咸惕息至門謝過萬里外知尊

朝廷

錢塘  
縣志

胡直字保林仁和人順治丙戌舉于鄉己丑成進士選庶  
常授編修出爲江南布政使叅議備兵常鎮下車聞駐防

某驕恣當路莫敢問直盡得其奸利狀論如法江盜起株連不已捕使按籍鈎索直曰亡命之口害及無辜異綬須臾死耳堅不肯發率力白之己亥海寇入犯直屏驕從佩弓鞬力保危城寇遁召爲鴻臚寺卿踰年進右通政後以弟襄病逝遂接獨子例乞養不復起直持身嚴正居鄉不以寸牘干官府邑有利弊則竭力爭之事父母以孝聞撫

從子女如已出

仁和縣志

翁祖望字渭公錢塘人順治己丑進士授內府中書舍人擢監察御史巡視宣大有武弁素不法省方者至多陰爲其所脅祖望獨毅不爲惕下車卽疏劾遠近震悚聞者忌

之改文選主事銓次肅清久之調考功員外郎乞歸家居

杜門惟課子讀書雍睦之風爲世矜式

錢塘縣志

王紹隆字緱山海寧人順治己丑進士選庶常授國史院檢討晉諭德丁酉主江西試改江寧道叅政拊民疾苦江寧爲前明陪京多任俠犯科莫敢過問紹隆擒其魁誅之兵民安堵無何海寇入犯舉城洶懼紹隆沿江閱視三晝夜馳數百里歸謁制府畫地形區要防守所宜悉中機要軍中掠難婦千餘白制府悉以還民事平鞠從逆諸人多

所湔雪

海寧州志

成肇毅字而卓仁和人順治六年進士知新河縣有惠政

擢禮科給事中條奏剴切時悍奔馬逢知跋扈殘人莫  
敢撻擊毅奮然曰事孰有大于此者乃密疏其二十四大  
罪逮置重典朝野稱快擢京卿需次乞歸

舊志

項景襄字去浮錢塘人順治壬辰進士選庶吉士授檢討  
歷侍讀侍講學士少詹事內閣學士兼禮部侍郎終兵部  
右侍郎景襄在翰林究心掌故及副兵樞叅密勿毅然有  
爲時烽燧雖息而瘡痍未平定謀決策天下想望其丰采  
已未夏刑部疏請改五流之例應徙邊者無論遠近戍烏  
喇景襄力爭曰五流非死法也今戍烏喇卽無生理卒從  
景襄言山東瀕海多捕魚爲業巡撫議凡駕大航出洋者

罪以通海景襄曰山東與內海不同江浙海寬無礁易泊  
山東一望滄茫無艤舟地且沿海業許民捕捉船許容二  
百石海船非篷桅不可行今奸吏舞文以此羅織愚民僅  
博衣食而乃設陷阱殺之乎由是皆免遂著爲例時聽競  
贖難民有以病棄中途者親屬以爲請有司勿敢從咨兵  
部景襄曰旋師棄俘必待部文始聽歸則遷延月日其人  
已死矣請令有司核實遣歸不必申部至如溫台百姓三  
十九家來京贖其子女既有印結是良民卽宜放還不當  
取其身價其遇事敢言如此卒

賜祭葬

錢塘縣志

傅感丁字雨臣錢塘人順治壬辰進士授德安理刑用薦擢監察御史歷刑科都給事疏劾江撫淮運河藩諸大吏凡所建言俱褒納出巡河東鹽政歸日惟琴書蕭然而已歷太常大理僉都通政授副都御史尋以母喪歸籍不起

錢塘  
縣志

嚴沆字子餐錢塘人順治乙未進士授庶吉士改給事中丁酉典試山東故事聖裔無舉者四氏子不得獨雋沆疏請得薦舉二人著爲令康熙初擢吏科掌印給事中請解有司被叅之任杜督撫委卸之端職官選授不便在籍候憑悉見施行歷陞太僕少卿僉都御史擢副都御史踰年



任總督倉場戶部右侍郎軍興孔棘沆通羸絀剔侵冒進  
不軋衆退不廢公歲省金錢數萬餘乞養母歸卒子曾渠

另有傳

浙江  
通志

顧豹文字季蔚錢塘人順治乙未進士除河南正陽知縣  
河南經流賊蹂躪正陽僅存廢壘豹文招流亡慰疾苦民  
稍稍集初慮囚釋其輕繫數十人有重罪二人豹文欲爲  
平反吏持牘爭曰是不可赦豹文曰新國用輕刑不限成  
例遂立釋之縣故無學宮儒官寄居民舍乃建學宮邑爲  
黃憲故里爲建祠率諸生拜之曰此邑中表率也行取擢  
御史疏稱五刑輕罪或至全家繫縲宜廣好生之心罪止

本身寬其連坐罪人七十以上十五以下概從周內殊可  
矜憐乞原情定律使無知老幼得遂生成又疏言鹽法壅  
滯宜明勅地方計口定額度道里遠近以酌食鹽之便否  
巡視東城發奸摘伏三輔畏其神明出巡湖北察鄖襄川  
蜀諸賊多竄伏谿谷乃圖其出入諸徑窮其巢穴賊始不  
得滋蔓請蠲漢安荆襄鄖等州縣未完錢糧及無徵額課  
民困始蘇察湖北水利莫要于安陸有蘆汊口堤墜久圯  
潛沔歷年被滄遂督州縣刻期竣役湖堤屹然復建義倉  
一百四十餘所巡按鄖陽捕邪教竊發者斬李龍鳳劉福  
等于市而赦其脅從賊黨遂散會撤巡按還京師以省親

告假歸里居兩年再入臺疏劾悉當道內外艱引病乞休

錢塘

縣志

楊雍正字自西海寧人順治乙未進士知高要縣地當廣  
右之衝制府駐節師行絡繹供億甚煩雍正力減浮費拊  
恤夫役有百夫長持軍符下縣語不遜雍正坐而撻之帥  
以愬制府制府曰書生強項廉吏方剛是不可犯乃杖百  
夫長荐雍建于朝徵授兵科給事中歷刑科掌印因星變  
上書請求直言詢利病并飭內外臣工滌慮洗心共修職  
業奉

百嘉之歷兵部督捕理事左右通政太僕卿以都察院左副都御

史巡撫貴州時湖北東川甫定道次鉅仁烽火迫城下官屬請避去雍正曰鉅仁黔境巡撫身任封疆去安之因命燔其後山開南門以待偵者賊疑有伏不敢前既至貴陽疏立營制禁侵掠捐賦稅省力役安集客戶俾有寧居師還有約束不明者輒上章劾奏軍中號爲楊一本始至貴陽斗米值五千錢教以耕耨比及三年竟成樂土旋召入爲兵部左侍郎以母老乞養歸子中訥字崑木康熙辛未進士官中允提學江南

浙江通志

陳鼓永字離期海寧人順治乙未進士授內翰林宏文院庶吉士歷左都御史晉工部尚書服官二十四年勤慎如

一日八閩初平軍需旁午度支日絀獨疏乞蠲全書通課  
竟得請又上表揚忠節疏請卹死事諸臣及掌工部遇獻  
議開採者必力持之鼓永有至性父爲人株累訟寃請以  
身代事繼母孝復推蔭于繼出之弟貴而能貧沒無以爲

殮謚文和給祭葬

海寧  
縣志

徐旭齡字元文號叔菴錢塘人順治乙未進士授刑部主  
事改吏部歷員外郎前後居銓部八年夙弊一清遷禮部  
郎中改雲南道御史疏十數上視饑兩淮時黃淮並決流  
民載道旭齡區畫賑卹全活甚衆擢僉都御史巡撫山東  
下車劾墨吏數人嚴禁倉糧河夫之最病民者豪猾望風

歛迹陞工部侍郎總督漕務至淮以籌三便釐三害等疏

奏請悉見施行卒年五十八

賜祭葬諡清獻

浙江通志

旭齡先世居玉山父一鴻徙家錢塘仍授徒

故里順治戊子山賊竊發一鴻被害辛卯旭齡往求父屍走邑之四都長號于途夕暝遇樵人止宿因言曾識一鴻當求之西村管平山中是夜夢父携示死所且曰當問之毛廿八旭齡卽戴星往有一嫗見之曰君非徐先生子耶先生被害于魯家倉旭齡行至魯家倉風雹大作慟哭絕壑間忽見童子跨牛背而歌旭齡扣之引人茅舍一父老出旭齡曰丈人非毛廿八乎父老驚駭告以故乃指空林

間土微掩處恍忽如夢所急嚙指血沁之解所衣裹骨歸

鄉人奇其事有繪徐子負骨圖者

兩浙鹽法志

王益朋號雀山初名聘錢塘人順治辛卯舉人尋改名登乙未科進士擢二甲第一人選庶吉士改戶科給事中遷兵科密疏劾閩鎮馬俊寶逆狀後俊寶以叛伏誅朝士皆稱其能首發奸宄歷兵吏二科言論卓然轉京卿會丁父艱服闋以病請告家居者數年起補太僕寺少卿卒

錢塘縣志

按鄉賢留祀冊稱仁和人

楊鼐字靖調錢塘人順治乙未進士授大名府推官行取授戶科給事中康熙元年頒

詔西川時遣秦兵鎮蜀并遷家屬以實其地秦兵甚苦之黷至寧  
夏遂上言西川自張獻忠屠戮後千里無生人今以戍守  
之兵令其拋室廬挈妻子以填虎狼之窟此非徙之實死  
之也古有踐更番休之制造相轉調于法爲便疏上報可  
改吏科陞鴻臚卿尋轉通政使母老以終養得請

錢唐縣志

陳論字謝浮海寧人順治辛丑中會試康熙甲辰成進士  
入翰林丁未分校禮闈甄拔皆名士己卯主試中州稱得  
士由少詹事擢副都御史鎮靜守法不務爲搏擊楚有婦  
人誣以殺夫寃獄爰書已定力爲平反遷刑部侍郎各省  
上獄必手自核審不假吏人每夜分不寐終任無濫刑事



長子世儀知海澄縣縣有浮官渡悍兵騰舟截流山民採  
木者苦其侵陷世儀悉繩以法興義學豁懸丁教養皆歸  
實政丁父憂歸旋卒遣命子克鑑修邑文廟後祀之鄉賢

海寧  
州志

邵遠平號戒三錢塘人初襲舅氏吳姓名遠登康熙甲辰  
科進士選內宏文院庶吉士散館改戶部主事出督漕運  
充國史纂修官與修實錄壬子順天同考名士多出其門  
轉戶部正郎除江西提學修葺白鹿書院大興文教吳三  
桂煽亂軍興旁午遠平以儒臣兼理軍芻內擢光祿寺少  
卿舉博學宏詞科仍授翰林院侍讀同修明史辛酉典試

廣東陞春坊庶子充講官轉翰林侍講學士陞少詹事侍講學士與修一統志性耿直不稍媵要雖以此取忌不顧也尋致仕歸遠平高祖經邦著宏道宏簡宏藝三錄遠平復著續宏簡錄四十二卷息影湖莊杜門絕客自作年譜敘其出處尤篤族誼宦歸口出千金子族人置莊田以供祭祀鄉人稱之四子錫蔭錫榮錫章錫光俱有文名孫晉之曾孫昌臯先後以詩文著於時

浙江者舊傳

嚴曾榘字方貽錢塘人戶部倉場侍郎沆之子曾榘少隨父任入太學登甲辰進士授庶吉士改廣西道御史歷臺諫二十四年多所建白人比之驄馬御史有伶人冒籍入

賞銓選得知縣曾槩以縣令民之父母不可以優伶恣睢  
民上特疏極言遂罷斥累官至通政使時湖廣督撫相參  
訐下部議巡撫再疏辨曾槩以封疆大臣不能同寅協恭  
今已發部議宜靜候處分擢副都御史奉

使祭北嶽山右民挾持官吏擁馬首呼籲曾槩爲宣威德諭所  
司加意撫綏民乃服終兵部侍郎累籍貴仕而家無私積  
其汲引人才扶植後進唯恐不逮故俸入多不給卒之日  
柩不能歸僚友故吏下至胥卒皆涕泣致賻

錢塘縣志

龔佳育字祖錫錢塘人起家龍驤衛經歷知安定縣縣自  
明末被流寇廬舍蕩然民多逋賦佳育以徵糧耗羨盡歸

公帑抵積欠於是逋額悉完前官被劾者皆得釋葺學宮及城隍廟又於城隅繕屋宇數百間流亡畢集入爲戶部主事建議豁浮糧得著爲令歷兵部郎中遷僉事分巡通永道除經斛重稅抑佞人驕橫有稱詐勅者立執之擢江南布政使以清介聞墾田至三十六萬餘畝內遷太常卿

改光祿卿旋卒

王士正帶經堂集

盧琦字景韓錢塘人康熙丁未進士授編修請告歸養居里門者五年吳三桂反母劉促之入都曰此非臣子偃息時也起補原官陞右諭德丙辰分校禮闈歷庶子侍講侍讀學士少詹事纂修實錄明史充方畧館總裁琦長於史

學熟諳朝章國典分纂常先他人性恬靜不事奔競丁卯  
春擢內閣學士屏絕竿牘聲望翕然會以前所舉大吏被  
劾牽連落職歸年五十三執母喪哀毀盡禮遇忌日輒終  
日悽愴兄璉卒於官多逋累爲代任之父友三喪未葬竭  
力攸助家無餘資而粗服菲食處之泰然

錢塘縣志

陳詵字叔大號實齋海寧人康熙壬子舉人由中書簡吏  
科給事中前後章奏十數上悉關大體時准黃交漲請復  
天妃閘舊制俾淮得全力注黃并于中河多建閘座節級  
啟閉盡閉諸減水壩兩岸清水悉入黃河則清口深通底  
績可期又蒲臺令威逼致命潛江案誣姦擬辟皆據揭直

糾詞連大吏畧無瞻顧庚辰會試同考累擢至副都御史  
巡撫貴州黔故山岨犖确而地有遺利民不習農桑且處  
升科爲累詵特奏罷之勅以耕種不二年墾田數千頃又  
攜善蠶者卽署旁浴蠶治繭集民婦觀之始知織紵募民  
多樹果木購種他省物產以饒三江苗民弗靖督兵討之  
一月而得渠魁親簡營伍出被掠男婦無算兵民錯居易  
濞事捐五千金別建營房處之民賴以安調撫湖北蒞任  
甫七日卽劾去藩司之不職者羣吏肅然時江浙米貴遂  
大弛米禁商販銜艘東下而楚米騰涌立借藩庫五萬金  
貴糴賤糶以家貲償減值三省米價悉平荊州權使奏請

於白螺磯設關增稅下督撫會議詵力持不可乃止尤勤  
於造士在黔建德新書院在楚建江漢書院講學論文誨  
人不倦初湖北鹽規歲餽至二萬金商因昂價病民詵斥  
其餽嚴抑之商感其義瀕行奉萬金爲贐力卻之晉工部  
尚書轉禮部時年已七十涖事益虔越七年嬰疾致仕歸  
逾年入覲以疾卒於邸第

賜祭墓諡清恪祀鄉賢

海寧州志

裘充珮字次章錢塘人康熙壬子順天副榜歷仕至光祿  
卿充珮在諫垣日奏牘皆切中機宜如論六部曹郎各有  
專責預定截取之法使朝無曠職如論錢法當清私鑄之

源而行使之人不當從重擬在刑科尤審慎詳明凡有陳奏多見施行奉

命典祀南鎮挈法書名繪以行所過江山勝蹟著爲題詠充珮以

政事兼能文章卒之日朝野惜之

錢塘縣志

徐潮字青來一字浩軒錢塘人康熙癸丑進士選庶吉士授檢討遷春坊贊善甲子主江南鄉試歷諭德庶子少詹事晉通政使陞副都御史轉工部侍郎督理錢局甲戌會試總裁丁母憂服闋卽家起刑部侍郎出爲河南巡撫潔已奉公苞苴屏絕除南陽黑鉛之累清衛輝辦漕之弊開溝洫以資兩河灌溉革省城上下供應杜發馬派買暨土



棍壟斷市集之禁以安里遞商民其于屬員尤殷殷教誨  
俾爭自濯磨咸奉法紀閱四載擢戶部尚書充

經筵講官兼翰林院掌院學士時高寶居民常被水患皆由洪  
澤湖漫流宜于高城三壩下築隄束水以入湖又于下湖  
諸邑築隄束水以達海事下九卿議及議上

聖祖獨與潮面論形勢指授方畧遂

命往董其事至則相地形程器用酌遠近料盈縮分職任役人爭  
赴功僅百日而工竣四十七年擢吏部尚書逾年以疾乞  
休原官致仕五十四年卒于家

賜祭葬諡文敬入祀賢良祠

浙江通志

顧祖榮字山容錢塘人少著文聲康熙癸丑登進士選庶  
吉士留館授編修丙辰校士禮闈稱得士歷春坊贊善遷  
講讀修平定方畧一統志唐類函諸書加講讀學士轉詹  
事遷內閣學士兼禮部侍郎祖榮歷清班居京邸門不施  
箔以蘆席避風雨性至孝雙親在里累欲乞終養以父命  
而止聞母喪疏云八十老父未遂終養君親兩負聞者傷  
之祖榮好研窮西銘皇極之學書法其餘事也子寧繩已  
卯舉人有文名

錢塘  
縣志

裘克美字大文錢塘人康熙丙辰進士由中書考選御史  
居官清介有風節巡視兩淮鹽漕兩淮數嵯差第一不必

脂韋而循例取贏動輒數十萬計充美草陋規居官刻苦澹泊矢捺冰燄禁餽遺絕宴會蕭然一室凡供帳飲食豪

奢之具揮斥殆盡

錢塘縣志

汪霽字朝采錢塘人康熙丙辰成進士補行人舉博學宏詞改翰林院編修纂修明史辛酉典試陝西榜發皆知名士遷春坊贊善擢祭酒太學陋規盡革除之總理通鑑綱目講義歷陞內閣學士兼禮部侍郎編纂佩文韻府成陞授戶部右侍郎旋

命纂輯佩文齋歷代咏物詩戶部素稱脂膏之地霽一塵不染有笑其迂者曰公雖不取適以飽奸佞之橐耳霽正色曰吾

受殊恩愧無尺寸之效可以仰答高厚所以潔已者非爲  
立名地也主順天鄉試榜發論者稱其明歸田後杜門掃  
軌不與戶外事羈性伉爽與人交不設城府不立崖岸人  
以是樂親之其弟之子成祺正祺性孝友善讀書工詞翰

相繼早卒時論惜之

錢塘  
縣志

祝增字任菴海寧人舉康熙丁巳鄉試知雞澤縣沙河爲  
漳洶下流秋潦橫發災自邑而及於鄰增力濬支河二道  
水得南下凡南和任縣諸鄰邑皆受其福補臨湘設育嬰  
田廬化溺女惡俗城陵磯險絕時覆舟懸賞救活無算再  
補鄆縣出冤殺之罪而坐其旁證者河決邢家庄身立衝

口堵築屢潰六日卒得定遂修劉忠宣所治兩渠故道民稱祝公渠考最知解州猗氏民楊步月等爲亂增單騎往撫縛其渠魁廖三人時河東頻患小蠹遂膺薦爲平陽守咸聞風解散治郡五載兵民協和轉運嘉峪軍需安集河南難民尤宣力施惠之大者卒官祀名宦

海寧州志

許汝霖字時菴海寧人性篤孝友讀書根柢經史康熙壬戌進士選庶常歷贊善視學江南釐正文體整飭士風丁卯典試四川癸未總裁會試衡鑑不爽銖黍科場例不錄五經卷汝霖任禮部侍郎時力持之得增額有差又廣兩浙湖廣解額皆著爲令出修子牙河度勢選材不期月而

奏績變斥鹵爲沃壤河獻八州縣之害以除召爲戶部侍

郎尋晉禮部尚書兼理戶部

上軫念民依有全蠲直省錢糧之

諭廷議欲免三之一或半之汝霖獨慨然曰此

熙朝恩覃九有不宜沮格于是各省輸蠲之

詔下立朝三十年精白乃心

聖祖嘉其績親書清慎勤匾額賜之平生慷慨好施祿俸所入恩

周三黨

子告歸著書講學式化鄉閭

海寧州志

陳元龍字廣陵海寧人康熙乙丑會試

廷試皆第二授編修以績學工書入直

南書房超擢侍講歷庶子學士

上親征噶爾丹及

巡幸塞北江南每行必預扈從晉正詹乞歸養父喪畢年近六旬  
將有終焉之志就家起授掌院學士尋補吏部侍郎巡撫  
廣西元龍以邊徼瘠土民方患寡且貧督飭屬吏盡心撫  
字設法積穀創建巨倉二百餘間名萬年倉各府要地皆  
有分貯至今利賴重建興安縣陡河石堤竝三十六陡門  
盡復漢馬援唐李渤故蹟又爲置渠田取息以善其後猶  
猶有不逞者密授諸縣令意指礮厥渠魁戒勿株累土司

帖然會鞠廣東流民案同事者欲深求元龍獨憫之上疏  
請從寬典全活無算撫粵七年吏畏民懷衆建愛日書院  
爲尸祝地陞工部尚書建議海塘河工悉中機要轉禮部  
逾年以原官侍奉

景陵結茅馬蘭峪者六載召拜文淵閣大學士年逾八旬疏乞骸  
骨加太子太傅致仕令其子編修邦直隨歸侍養

賜廕一孫乾隆元年

特勅本省給與全俸閱三年以壽終謚文簡生平敦倫飭紀而  
博愛好施予在官在家捐資利濟不可勝數

海寧州志

湯右曾字西崖仁和人少有才名康熙二十七年進士授



編修三十五年典試貴州三十九年授刑科給事中疏言  
瓊州文武官遣人往黎峒採花梨沉香滋擾啟釁總督石  
琳巡撫蕭永藻提督殷化行平日既無覺察遲至一年始  
行題報則其掩飾欺隱可知矣若不懲儆恐致效尤琳等  
皆自引罪四十一年轉戶科掌印給事中疏言九卿會議  
錢法大抵謂當改鑄大錢其舊鑄小錢二年後俱行銷毀  
臣以爲大錢誠宜改鑄若銷毀小錢民間必致驚擾大戶  
貯錢多者無論矣小戶或一二千文以爲資本仰事父母  
俯育妻子甚至負販之人不過四五百文終年衣食其中  
一旦廢置則貧民失所卽謂許暫行二年民間知二年之

後必廢誰肯行者至謂官給定價收作廢銅則收受之際  
吏胥或高下其手錢局工料耗折甚多且新鑄之錢豈  
能及遠新錢無多而舊錢已毀奸民乘間圖利私鑄愈多  
錢法愈壞古者子母相權宜仿此意新鑄重錢每串作銀  
一兩而舊鑄輕錢每串作銀七錢積至歲月大錢流通小  
錢自不行矣會議如右曾所請四十四年督學河南以公  
慎見稱陞奉天府丞歷光祿寺卿太常寺卿通政使翰林  
院掌院學士五十二年擢吏部右侍郎兼翰林院掌院學  
士六十一年正月卒年六十有七

浙江耆  
舊傳畧

凌紹雯字子文本仁和徙錢塘父克充博學多文隱居教

授紹雯生而穎異甫三歲母朱口授毛詩便能成誦稍長貧不能延師父親授四子六經後受徒教學肆力于文康熙丁巳領鄉薦北上貧不能歸遂館京師戊辰成進士選庶吉士授編修尋陞國子監司業校平定沙漠方畧屢遷內閣學士兼禮部侍郎紹雯爲人清介自守自庶常以至閣學不携家累至都止寓居翰林院官署衣服浣濯者數十年不忍棄飲食菲薄自甘不妄交遊閉戶讀古人書性嚴毅寡言笑不輕然諾燕居危坐一室臨事介然不惑卒

賜諭祭

錢塘縣志

錢肇修字石臣錢塘人少孤奉母至孝學問該博工詩年

四十遊京師公卿皆折節與交康熙辛未成進士知洛陽  
縣七載潔已愛民用薦行取出郭門百姓攀轅送者數十  
里擢監察御史條奏積貯分建倉廩備陳錢法指叅貪墨  
爲

國家與利除害巡視北城治獄多平反嚴懲奸猾不少竟假  
有優人倚勢豪橫當路側目羣修挺然執法顯貴膽懾直  
聲大振平居性恬淡不治生產公餘輒讀書妻林亦工詩  
方宰洛陽日衙齋蕭散薰爐茗椀夫婦唱酬爲士林佳話

錢塘  
縣志

范允鏞字用賓錢塘人康熙庚辰進士授安平令甫下車

減征耗禁飛泐嚴盜賊時糶糴行取刑部主事改工部擢御史累有建白歸同時柴謙字存抑仁和人由內閣中書遷刑部主事擢福建道御史並有直聲耆年歸里與允鈞優游閭巷鄉邦推重焉

雲夔齋詩話

沈近思字位山號閻齋錢塘人康熙庚辰進士授臨潁令潁與許接壤有孔家口水勢衝突爲潁患近思出夫十之七助許築隄俄水發安堵無恙又捐建社倉積穀四千餘石建紫陽書院課士復建雙忠祠以昭忠義陞南寧府同知南寧山險多盜近思力行保甲嚴督緝捕期年寧謐尋改清河本裕倉監督蒞任一月綱紀利弊整釐悉當奸胥

欵迹旗弁暴悍者痛懲之雍正元年陞文選司郎中歷晉  
吏部右侍郎轉左卯出百歸庭無私謁當奏

御之日必越宿齋戒然後敢進惟以至誠篤敬盡職分所當爲擢  
左都御史表率臺端風清紀肅所進奏疏非發議准行之  
日人莫得而知也卒于官室無餘資

賜帑金一千兩

詔贈禮部尚書太子太傅謚端恪

浙江通志

陳世倌字秉之海寧人禮部尚書誥四子也康熙癸未進  
士由庶常歷侍讀屢主山東廣東順天鄉試督學順天絕  
苞苴請託慨然以禮教導俗刊布養正初訓諸編畿甸士

民競知勸募游擢內閣學士出撫山東會境內多蝗世倌履境密訪被蝗諸處損稼重輕且以察羣吏賢否具知其畧而後視事卽分檄勸懲興除利害洞若觀火莅東二載通漕運卹災黎禁左道築隄防善政迄今利賴焉嗣以舊案被劾

詔往江南水利自効通濬吳淞白茆諸工繼葺文廟孔林報竣

今上御極起爲副都御史遷戶部侍郎督漕通州歷左都御史工部尚書辛酉拜文淵閣大學士會淮揚大水敷陳數事上知世倌夙善籌河乘傳周覽上自徐鳳下至海口南至六合北至芒稻人字河見河身墊高海口紆曲謂宜亟加疏濬

明年人告後每集議河務或疏諭情形皆本確見旋進階  
太子太保壬申甲戌兩充會試總裁戊寅冬以衰老乞休  
進太子太傅

賜詩寵行家居食俸將就道卒于

賜第諡文勤給祭葬如禮

海寧州志

徐本字立人錢塘人康熙戊辰進士改庶吉士授編修直  
武英殿纂修雍正元年與修

聖祖實錄分校順天鄉闈督學貴州晉春坊贊善翰林院侍讀卽  
其地轉廉使明年調江蘊晉湖北布政又明年鎮撫安慶  
安省宿毫之間向號雀符本至廣設偵邏沿江塘汛一百



七十有七至是增備塘船二百有奇探丸無所容跡壽州積盜孫平焦鄧數姓假捕魚爲業莫能窮其出沒密以計擒坐其渠魁漁舟編列甲乙使互相舉發盜藪一清向例蕪鳳二關歸巡撫兼理釐剔權政裁汰冗員吏皆畏法條陳徵糧事宜州縣糧櫃用道府封條宜爲變通十截串票宜停止小民零星錢糧宜收制錢以免守候折耗癸丑內遷左都御史未遷郎

命沿浙讞江山獄江山王益善者素無賴妄覬揭竿號衆事發牽連兩省人心悚惑不知所屆本寘爲首者十餘人于法餘輕重當其罪一切勿蔓引計所全活千餘人乃會督臣上

奏衢州爲三省門戶崇山密菁最易藏奸請將衢協改總  
兵官以資彈壓金衢嚴三府幅員甚廣請設巡道一員駐  
劄衢城江山縣之清湖鎮峽口念八都地皆險要請添設  
同知一員分防諸處又交審叅革杭州府同知吳宏曾及  
叅革江西玉山縣王渾仁兩案決斷明允悉報可旋晉工  
部尚書協辦大學士兼左都御史攝刑部尚書乾隆元年  
充律例館總裁官授東閣大學士兼禮部尚書管刑部事  
入直

南書房以總理事務議敘給雲騎尉世襲四年加太子太保  
六年管理戶部尚書事務八年以疾乞歸加太子太傅卒

晉贈少傅諡文穆入賢良祠

墓誌

趙殿最字奏功一字鐵巖仁和人康熙癸未進士由部曹歷掌科使盛京寧古塔督視船廠擢詹尹使四川打箭爐之噶達督視廟工兼塘汛東西車馬萬里口不言勞東行則劾奏勦衛駐防之爲士卒害者西行則直陳撫臣徇蔽私人阻撓興築之失而後大工以集諸番以之大和官至戶部侍郎陞工部尚書左遷抵家居丙舍不入城沒後道命不用訃狀不備儀物聞者以爲近世大臣所未有也

墓誌

包括字銀河號虞軒錢塘人康熙乙酉與兄芝豫同舉鄉薦丙戌括成進士十年出宰蜀之長壽遷刑部主事晉員

外郎知常州州爲江南大郡稱難治括之治常則兼治其旁郡旁郡有疑事滯獄上官輒以委之括性敬老而憐少常人稔知之其黠者或雇倩老嫗穉子懷訟牒當車而哭括不以其詐必咨而詢之霽容色以安之覺其詐乃詰之旣服叱之去民皆感動不忍以故習潤治行亦用是益清簡去郡之日百姓請于大吏崇祀名宦擢登萊青道累遷安徽布政使署江西巡撫旋以京堂用疾卒

墓志

王璣字象天錢塘人由貢生知真定縣在任五年有白日青天之頌康熙丁酉內擢刑部員外以西曹爲出生入死地聽斷之下必多方援引以白其寃遂見知於尚書爲所

獎許後尚書赴豫勘問事件奏請借往一切稿案俱出其  
手已亥陞戶部郎中稽查十四省利弊退謂同官曰各司  
事非吾素諳與其某至而核辦曷若自爲檢舉更可徵諸  
公材幹不旬日而釐剔一清七月簡任常鎮道許摺奏稽  
察屬員體卹民隱種種善政如清理海口免派丹徒丹陽  
民夫言人之所不敢言人咸服其膽識歲丁未調福建未  
抵任陞光祿卿清查八旗錢糧馳驛山西辦臨晉民變案  
至晉日卽令撤兵曰是不過畏死避罪之愚民非烏合之  
衆除首惡外悉令出堡衆喜曰我輩得見天日矣不三日  
瓦解獲其首從七人定擬擢通政使丁內憂陞戶部侍郎

在任守制地理清查江南積欠錢糧未啟行復有署理蘇撫之

命後以事歸辛亥奉監督普陀航海登山經營相度閱兩載而告竣乾隆十六年春

聖駕南巡賜鴻臚寺卿

行述

俞兆岳字岱正海寧人少孤事母孝由宣平學博授大田知縣績效大著調臺灣地雜番民設重鎮控制之廢弁嘗相聚爲盜兆岳執盜魁數人置諸法或欲盡誅其黨兆岳曰化盜爲民不亦可乎大吏善其言所全無算海外週歲歉奸民易乘機生變乃立社倉多積粟以溝之由是終其

任無爲盜者遷松江同知請豁浮糧歷青州知府行富鄭  
公救荒法陞通政司叅議擢太僕寺卿出理松江海塘立  
法盡善每於石層累處貫以鐵筍橫排處關以鐵鍵聯衆  
石爲一片水衝激不可動江撫尹繼善上其法以爲程式

八年塘成擢江西巡撫

海寧州志

姚三辰字舜揚仁和人康熙五十二年進士授檢討雍正  
四年以大學士張廷玉薦

召對養心殿充講官累遷內閣學士乾隆元年陞兵部左侍郎典  
江西鄉試移吏部左侍郎二年充會試副總裁關中得疾  
未幾卒三辰居家以孝友聞尤篤友誼遠近稱爲長者子

日升雍正八年進士刑部山東司主事

墓志

孫立德字次功

廕主事收通判乾隆十九年授景州知州景州舊俗牽人於市就牙戶估直如牲畜然謂之人市親死三日舉家赴城隍廟冥獄哭奠謂之哭廟立德諭以禮義舊俗頓革移定州創建書院興文教州南鄉曰總師屯迫唐河水溢民散迺營城中曠地葺茆舍數百間招集流亡後遂稱總師街歷知大名秦安濟南府連擢運河道淮徐道山東按察使署河東河道總督二十九年春實授秋八月陽穀賊王倫亂卽率標兵往勦抵張秋賊退還陽穀復入堂邑時議以巡撫徐績進勦立德分守東昌嚴約束誅間牒城圯難



守引運河水繞城壕賊不敢犯檄發倫祖墓墓中有異狀  
遂磔其屍會大學士舒赫德殲賊於臨清山東平四十二  
年河決儀封罷官後補淮安裏河同知旋卒

行狀

徐杞字集生號靜谷錢塘人康熙五十一年進士選庶吉  
士授編修改御史歷京畿道砥礪風節多所建議轉通政  
司叅議晉四譯館太常寺少卿雍正八年赴廣東巡軍政  
嚴開礦之禁調甘肅布政使奉

命修城十年調湖南布政使擢西安巡撫入爲宗人府府丞告歸

進行

范咸字九池仁和籍錢塘人雍正元年進士改庶吉士授

檢討纂修會典壬子典試廣西遷中允督學山西累擢洗馬庶子請增蒲州澤州二府學廩增附額試解州道過安邑有教諭餽以金怒叱之或請入奏曰吾方自愧無德以致此敢徒暴人之過乎會以事去職在咸安宮官學効力是年冬補官學總裁乾隆二年授職編修三年充

**世宗憲**皇帝實錄纂修官尋改御史九年巡視臺灣奏請臺灣道府不必按季巡查每年分巡一次又請乘修水利之便亟復古溝洫之制以資利賴丙寅奏免本年臺灣官莊租十分之三臺郡牛皆閩粵民鄉人來臺輒引與居惟有疾恐不可救卽委棄乃創建普濟堂更制田爲久遠計至今遵

行咸積學能文尤深經學

述行

陸宗楷字健先號鳧川仁和人雍正元年鄉試第一旋舉進士充景山教習明年

朝考

特授檢討累充己酉壬子順天鄉試同考官庚戌癸丑會試同考官乾隆四年遷國子監司業五年改司經局洗馬十一年擢國子監祭酒請鑲白等下五旗包衣人入監讀書三十年五月擢兵部侍郎六月仍兼管國子監事三十一年調吏部侍郎充會試副總裁旋擢兵部尚書請修太學志三十三年典順天鄉試明年六月解領監務調禮部尚書

左遷內閣學士兼禮部侍郎未幾以原官休致祝

釐與香山九老之會歸主講敷文書院

行述

汪由敦號謹堂休寧人補浙江商籍弟子員讀書錢塘巡撫徐夢元薦充明史纂修官雍正二年順天鄉試是秋進士及第授編修由坊局轉侍讀乾隆元年入直

南書房張廷玉總裁明史以由敦專任其事補授內閣學士洊歷六卿由禮兵戶部侍郎擢工部尚書轉刑部爰書填委覃思推勘詳慎和平在軍機處行走十四年金川平叙軍功加三級旋加太子少師協辦大學士十八年晉階太子太傅準噶爾平軍功加三級永定河決固安奉

命往勘籌議堵築或請別開新河由敦主仍濬舊河爲便得  
旨允行都下錢米價昂議先支甲米加放月餉錢市價遂平由  
敦故以文章受知遇性縝密綜理庶務審覈安詳出入勤  
勞夙夜無倦二十二年春晉吏部尚書明年正月病卒贈  
太子太師崇祀賢良祠謚文端嘗出俸賜千金供先世祠  
祀仿范文正義田遺意屢掌文衡得人最盛承輯諸書各  
館皆爲總裁有時晴齋法帖十卷勒石

內廷

墓誌

梁詩正字養仲號薌林錢塘人五歲始能言性凝重與兄  
啓心砥礪問學雍正八年進士及第十二年

上書房行走擢侍讀晉侍講學士以母病乞假歸旋丁憂乾隆元年起用侍直

內廷三年遷內閣學士四年擢刑部右侍郎詳審律例遇獄詞矜疑不贍狗同官意辨論再三得當廼已調戶部右侍郎兼管錢法五年五月疏言度支經費莫大於兵餉之供當豫爲之計今春秋解部銀多不過八百萬少則四百萬而合計支銷須千百餘萬入不敷出每歲皆然蓋由八旂兵餉日增外省綠旂復多冗額是兵餉居國用十之六七矣八旂自各省駐防與近京五百里屯種以外各旂閑散丁男羣聚京師仰給餉食百年休養生齒日繁及今雖尚

可支給數十百年後當十倍於今錢糧有定額迺以瞻日出無窮之閑散使僅取給餉額則兵弁所支不足供閑散之坐食而生計日蹙欲增給於額餉外則民賦常制斷不可稍加國用所需又無可節縮不且上下交困乎臣竊謂長久之計非屯田不可興盛二京根本之地王氣所鍾附近膏腴未盡懇闕非若內地之無閒田曠土也請於黑龍江寧古塔諸處分撥旂人居住耕種自爲生養使世享耕牧之利以時講武兼實邊防則蕃衍之餘盡成精銳陪京增拱衛之勢旂人遂生聚之謀國帑更無匱絀之慮矣各省綠旂馬步兵丁正餉於本省支銷今直省兵餉之數較

康熙時增至五六百萬之多雖以事漸增積習相沿豈必無閒冗乎營鎮分布四方每營有冗額則每歲虛糜不下數十百萬遂使各省地丁賦稅大半留支兵餉其不敷者尚須鄰省協支而春秋解部者益減矣武備之修當使訓練有方臂指聯絡但如舊制足用有餘不在時請增設請令督撫提鎮於添設兵額存其必不可減者餘則量爲省汰預酌定數以聞部核定議後有開除停止募補此於兵丁無裁汰之苦而可於營制有節省之規臣謹按帑藏盈虛深念兵餉繁重不敢爲豐亨豫大之言不勝憂盛危明之意誠以太平全盛而財力漸已不支不可不深慮也變



通成法以漸而行垂裕萬年之計莫大於此部議從之十年晉尚書詩正歷戶部長貳前後九載清釐錢法懲各司奏銷之倚閣案牘有輕重失當者親更正吏莫能欺調兵部會金川逆命調發機宜悉資經理故事經畧與大將軍體制無別迺考定章程自禡祭至凱旋告廟條上儀注載入會典十四年金川告捷加太子少師攝吏部尚書兼翰林院掌院學士協辦大學士十五年授吏部尚書協辦閣務如故銓部爲進退人才之地吏胥上下其手甚於他部加意整飭銓政以清十七年乞養歸二十三年四月丁父憂十月起署工部尚書明年調署兵部服闋授兵部尚書

二十六年補吏部尚書協辦大學士二十八年六月拜東閣大學士十月晉太子太傅卒贈太保謚文莊入祀賢良祠詩正性孝友居官勤恪屏請謁絕苞苴門庭肅然遇事有執守同官或媒孽其短

上廉其實

眷注倍殷供奉年久於內監無所交際多憎之

上益以是嘉詩正見

御製懷舊詩注詩正屢司文柄稱得人總裁各館手定去取歸於精要編校秘殿珠林石渠寶笈奉

勅書俱勒石侍從賚和有矢音集行世

年譜

柴潮生字禹門仁和人少穎異讀書通經史大義雍正二  
年舉人八年考授內閣中書在軍機處行走勤慎無所失  
誤乾隆元年轉內閣侍讀改盛京戶部員外郎轉工部郎  
中七年擢御史知無不言嘗疏陳荒政請以帑金發糴豐  
收各路菽粟以平市價又采虞集京東水利議徐貞明潞  
河客談請開直隸水利洞中肯綮俱報可上經義十餘篇  
折衷成說務歸切要議論悉由誠悃無所粉飾歷兵科戶  
科掌印給事中冰兢自矢歷久如一日後以失察被議解  
組歸以母老不復出潮生性至孝早歲得祖父母歡宦歸  
母年七十餘日親視膳蚤夕必問所須母性嚴偶或拂意

輒長跪自責母意解乃已與人交肫誠坦白見者無不重其爲人性好岐黃術貧家多請療治應手愈遠近稱頌之而潮生無德色主講粵秀書院因材施教造進多所成就年七十七卒有集藏於家

家傳

徐以烜字羨資號潤亭錢塘人大學士本子雍正八年進士選庶吉士授編修乾隆三年同考順天鄉試明年爲會試同考官累擢國子監司業翰林院侍講晉學士奉父歸籍起擢少詹事晉詹事遷內閣學士兼禮部侍郎視學畿輔授禮部右侍郎尋轉左左遷太常寺少卿復署內閣學士兼攝禮部事乞休歸清風亮節爲鄉黨所矜式

道古堂集

孫灝字載黃錢塘人雍正八年進士改翰林院庶吉士授編修乾隆元年充一統志纂修官旋典試湖北三年丁母憂服闋授御史居臺中六年多所建白言錢法之弊率由銷燬銷燬之弊患在銅少銅少之弊患在官民分而其力不足以相濟鑄錢于官所以爲民計也廣銅于民亦所以爲錢計也去其官與民之見而利溥矣又言督撫參官每有委耳目于他人因之偏聽生奸者或授意于標協之武弁或寄報于親暱之同鄉或密囑于信任之能員或旁採于効力差遣之下吏刺探非據弊端有不可究詰乙丑浙省錢糧通行蠲免又

諭承種佃戶亦應酌減租糧奏以如田一畝應納銀一錢者既經全免則田主佃民各沾五分之數將佃民所納之租卽以五分銀數爲準照米穀時價酌減蠲數多則減數俱多田主不得靳蠲數少則減數俱少佃民不得爭戾辰授光祿寺卿旋簡湖南布政使下車整飭政務黜陟無瞻顧十六年補授通政副使祭告南海却有司餽遺陞太僕卿歷通政使督學河南稱得士擢副都御史再任通政灑居官勤慎遇事有執持接人和粹見者服其名德

行狀

董邦達字孚存號東山又號非聞先世由徽州遷富陽幼而穎異能言卽辨四聲稍長以筆墨嬉戲年十一能文雅

正元年擢拔貢生例當入太學貧不能具資斧挾錢入枚  
徒步入京師朝考第一中順天己酉鄉試十一年成進士  
改庶吉士乾隆二年授編修時方修石渠寶笈秘殿珠林  
西清古鑑諸書以邦達博學精考核

命入內廷襄事累官禮部尚書三十四年七月卒於京邸

諭祭葬諡文恪邦達性易直和婉與人交言無不盡久者數十  
年無少齟齬于官屬不取輕儇喜事之徒其樸讐者督其  
不逮未嘗不庇覆之奉母孝養備至年五十如嬰兒痛父  
早歿不及養自奉儉素哀慕修其身平生澹榮利初官翰  
林時僦屋一廛閉門集生徒講肄從之遊者後多爲文章

名宿中年積俸置數椽朝退則手一編蒔花洗石泊如也  
善篆隸書妙得古法畫出入宋元諸家畢臻其勝奉

勅所作皆藏石渠

彭元瑞  
撰行狀

張映辰字星指號藻川錢塘人雍正十一年進士由翰林  
仕至兵部左侍郎左遷都察院副都御史映辰以少年起  
家科第長于詞賦而立身行已沖澹自得不激不隨後進

皆仰其風采焉

雲護齋  
詩話

張湄字鷺洲號柳漁錢塘人雍正十一年進士授編修累  
擢兵科給事中遇事無所依阿巡視臺灣廉潔自矢歸裝

唯圖書數卷而已

柳漁詩  
鈔序

子霽字懷月號硯廬乾隆十七



年進士十九年考授中書遷主事屢分校鄉會試稱得士  
三十六年擢御史巡城及管理街道寬嚴並濟都人稱之  
遷給事中巡視漕務以勤慎見重於時述行

金德瑛號檜門休寧人商籍入仁和學舉順天鄉試考授  
中書舍人博學鴻詞應薦乾隆元年會試中式廷試第一  
授翰林院修撰入直

南書房累遷內閣學士擢禮部侍郎以

內廷侍從出入操文衡者二十年所至廉明嚴整崇雅黜浮  
賞拔真才衡鑒不爽而道路馳驅詢問百姓疾苦利有未  
興弊有未革惻然心念不以身非司牧視爲泛常每奉使

還知無不言言無不實以太常代祀山西見女媧氏塑婦人像不經奏改木主十二年秋齊魯告饑發帑賑救而鄒滕以首被災尤劇有司格于例限未敢

聞十三年春自江西學政還入對言狀甚悉即日奉

旨展期博濟二十一年秋典江西試道出徐州見黃河舊道繞城而東者已涸緣秋霖暴漲河決上游之孫家集口水勢直奪微山河與運河通兗州金鄉魚臺諸縣漫爲巨浸以致舊道頓改駐一日與土人策杖登雲龍山周諮水性地勢堵洩先後之宜務使微山清水與運道相依不致黃流攔截入對悉陳本末工未可遲

上深嘉其直言無隱卽日遣大臣往視大興濬築水患以平二

十六年擢左都御史條奏時事便宜俱得請酌定秋審章

程陳案可省而近事更得實心詳審雖從容往復不虞淹

滯刊校招冊減幾大半上節國家有用之財下卹秋曹繁

劇之力卒于邸第櫬從運河歸鄒滕徐宿間居民夾岸哭

迎且送曰微金公我幾不活

齊召南撰傳

沈廷芳字椒園號菽林本姓徐氏仁和人乾隆元年以諸

生應博學宏詞試授庶吉士由編修改御史遇事直言以

古諫臣自勵奏毀明奄監王振像仆英宗李賢二碑聞淮

徐鳳泗等府連年饑稜請于常賑外發常平倉穀賑卹并

加賑直隸山東浙江甘肅之被偏災者請免各關米豆稅  
禁海洋採取議屯牧邊庭時連歲東南米貴暫停採買奏  
以貯漕抵補備平糶賑濟之需九年十月巡漕山東兼理  
河務凡河漕政務及民隱皆入告十年二月視運河小挑  
工程東平州民遮道言原圈安湖地奉

旨給予貧民墾種而豪強侵佔並有衍聖公鶯鴨五全兩廠地  
三百一十九頃奏言原圈之地割出十分之二以給貧民  
衍聖公三百一十九頃之地並請全給湖旁貧戶部議酌  
量分給十一年五月請以宋臣謝枋得於憫忠寺立祠設  
祭涿州雨水經時請加

恩直隸被水窮民俱報可再巡東漕歲旱步禱龍王城隍神雨  
立至改授登萊青道當山東積歉之後捐俸倡屬吏招集  
流亡給資本以墾復舊業設義塚檢埋遺骸又慮海濱沮  
洳多蝗蝻勸民預捕易穀如其數民爭趨之小清河河身  
狹隘山水發田多漂沒增堰疏流遂無患擢河南巡察使  
祥符丐逼其婦私於人後丐爲私者所殺婦畏不敢言乘  
間走告夫妹乞代雪夫寃論當絞廷芳謂婦旣不知謀乞  
小姑鳴寃是能爲夫報仇也而致之死於法未當大府執  
不可乃釋舊贖至三晝夜見成案所載有能爲夫伸寃者  
減等援以定讞婦得免死鹿邑豪民毆人死賄外鄉乞丐

代承誥得實置家民於法丁母憂服闋補山東按察使念  
愚民罔諳法律摘律中易獲咎者條列罪名張示各屬俾  
家喻戶曉二十七年致仕居家孝友篤志正學與桑調元  
輯餘山遺書掌教粵秀敬敷諸書院時比之安定

行狀

金甡字雨叔號海住仁和人少至性過人事母至孝借兄  
虞砥礪問學尤淹貫史事乾隆七年會試第一

殿試第一人及第授修撰典甲子廣東鄉試十年散館復第一  
擢贊善歷左庶子侍講學士壬申癸酉迭典江西山西鄉  
試督學安徽甡長於論文悉心校閱所至稱得士安徽學  
租舊於給貧外以公事報銷甡盡鈐所餘檄發提調備葺

繕學宮常事問遺止及茶藥無縞紵之受二十二年在  
上書房行走姓小心勤慎未嘗以私事休假清操介節尤見  
重於時嘗言養正之地殫竭微忱用資啓導不易膺斯任  
也先後侍書十七年自孝友大端至言動威儀之節罔弗  
盡言唱酬題咏皆寓意納箴

皇子皆監其試陞詹事督學江西聲望如安徽轉內閣學士  
三十二年晉禮部左侍郎三十八年以疾告歸主講敷文  
書院年八十一卒杭州籍紳極盛而都中無仁錢專館姓  
在都時捐金爲倡醵資構屋於虎坊橋東部署周備

質邸賜顏曰湖山凝秀至今鄉士如歸

狀行

王際華字秋瑞號白齋錢塘人乾隆十年進士及第授編修分纂續通考充丁卯順天鄉試同考官戊辰會試同考官擢侍讀學士協辦內閣學士直

南書房十五年典試湖北督學廣東丁外艱服闋起原官擢詹事二十年春擢內閣學士兼禮部侍郎夏晉工部侍郎兼管錢法堂二十二年調刑部二十五年調兵部典試江西二十八年充會試副總裁兼署吏部奏請武科鄉會試裁去合式字號則入場者皆有命中之心諸弊可悉除矣三十年調戶部督理京省錢法充

武英殿總裁明年兼工部督理寶泉寶源二局錢法教習庶



吉士請修葺庶常館三十三年典江南鄉試明年晉禮部  
尚書旋總理平糶詳核利弊總修國子監志三十八年三  
月充四庫全書正總裁加太子少傅八月遷戶部尚書四  
十一年三月卒徵歷三十餘年治事敏覈案牘必親釐定  
賡屬補敝奏對悉稱

自以小心謹慎見稱從祀賢良祠諡文莊

王文莊  
公行狀

鍾蘭枝字露卑海寧人少孤力學乾隆戊辰成進士授編  
修充

國史館纂修官分校鄉會試入直

上書房手集漢唐宋諸名臣奏疏足爲獻贊者顏曰名臣覽

要退食時坐卧不釋由編修歷學士一歲四遷視學闕右  
衡鑒有特識泣任六年始終無間陞內閣學士兼禮部侍  
郎以母老陳情終養

海寧州志

程燾字雲軒號九峯仁和人乾隆三年舉人七年考授中  
書十三年尚書傅恒經畧金川以燾從行軍功議敘遷武  
選司主事員外郎充平定準噶爾館纂修官旋從大學士  
黃廷桂赴陝甘授洮岷道總理軍需局西師凱還親至關  
展核定伊犁屯田悉中程度事竣乞近省迎養改江南驛  
鹽道擢安徽按察使善理冤獄丁母憂服闋遷安徽布政  
使移陝西晉湖北巡撫歲旱禱雨立應善于造士楚人德

之左遷江西布政使改授太僕寺少卿得疾以失察江西

屬吏歸行

述

邵樹本字立仁號蕢村錢塘人乾隆十三年進士選庶吉  
士授編修與壬申江南鄉試改御史典陝西已卯鄉試精  
審銜鑒所至得人督學山西善於訓迪士習丕變故事生  
員補廩增由縣府轉詳吏胥或故延時日資需索奏請聽  
教官徑申學臣以便寒士又奏除歲科生員卷面填注廩  
增附字樣以謹彌封著爲令巡視西城糾正冒糴之弊告  
終養歸主講紫陽書院

行狀

汪永錫字孝傳號曉園錢塘人乾隆十九年進士改庶吉

士授編修歷中允侍講江西福建山東正副主考

上書房行走擢侍讀學士晉內閣學士兼禮部侍郎生平於讀書外無他好入直二十餘年始終勤慎督學江西值

五巡江浙選江西士子長於詩賦者津遣江寧獻賦得與

召試遂沿爲例其善於獎進舉類此四十七年隨

駕熱河感暑歸京師卒於巴克什營

行狀

杭州府志卷八十二終